

四庫全書

集部

欽定四庫全書

集部

尊白堂集卷一

詳校官右中允_臣薩敏

主事_臣呂雲棟覆勘

謄錄監生_臣范重榮

欽定四庫全書

集部四

提要

尊白堂集六卷

別集類三 宋

臣等謹案尊白堂集六卷宋虞儔撰儔字壽
老寧國人隆興初入太學舉進士累官兵部
侍郎奉祠卒其行事不見於宋史而志乘所
載頗詳始為績溪令即以治行被薦遷監察
御史搏擊權貴朝廷肅然為浙東提刑徙知

湖州值歲祲推行荒政所全活甚衆蓋亦不徒以文學見長者集中有使北回上殿劄子是又嘗銜命使金考金史交聘表泰和元年是三月乙亥宋試刑部尚書虞儔泉州觀察使張仲舒等來報謝即其事也儔慕白居易之為人以尊白名堂并以名集其讀白樂天詩云大節更思公出處寥寥千載是吾師生平志趣可以想見故所作韻語類皆明白顯暢

不事藻飾其真樸之處頗近居易而粗率流
易之處亦頗近居易蓋心摹手追與之俱化
長與短均似之也然如除日獄空春蠶行及
勸農禱雨喜雨諸篇愷切慈祥詞意懇到足
以驗其心勞撫字固不當僅求之吟咏間矣
集中古文僅存制誥劄子二體已不免多所
散佚而辭命溫雅議論詳明於當時廢弛積
弊言之尤切其意亦頗有所取者據陳貴誼

原序集本二十四卷今從永樂大典中採掇
裒次釐為詩四卷文二卷錄而存之亦所謂
布帛菽粟之文雖常而不可厭者歟乾隆四
十六年三月恭校上

總纂官臣紀昀臣陸錫熊臣孫士毅

總校官臣陸費墀

原序

紹定己丑秋八月武岡守朝請郎虞君衡遣介奉一編書謁余序其首啟而視之曰尊白堂集乃其先人兵部侍郎諱儔字壽老所作也卷二十有二詞制奏議之卷七詩之卷十五衍裕雅重根柢經術緒密思清非苟作者獨未諭尊白之意何謂也侍郎平日常曰韓魏公有醉白堂坡公有我似樂天之句此吾所不敢惟知尊之敬之故扁以為堂吁安得此長者之言哉宜其詞章粹

厚不迂有樂天之遺風也唐史臣贊樂天謂其最於詩
今侍郎詩亦獨到讀之者知其為莊士雅人所謂畧無
杜牧之所譏者顧乃扁而尊之可謂廉於取名矣歷事
三朝出藩入從始終全德使獲盡展所蘊功業克就則
賡醉白之歌又將與魏同志而惜其不盡著也武岡守
繼家學政和惠知其親之善顯而傳之有足嘉者抑嘗
因是以觀白公之為人位不登乎丞弼功不著乎鼎鼐
而百世之下殊勛偉業名德文學之彥率願尚友慨慕

而不可得是其可尊者必有出於文章事業之外覽者
邇其原焉可也朝請大夫權刑部尚書兼直學士院兼
修玉牒官兼侍讀長樂陳貴誼序

欽定四庫全書

尊白堂集卷一

宋 虞儔 撰

五言古詩

暇日邀王天任諸公遊南坡天任有詩因次韻
梅黃收宿雨山綠呈層巔高軒陰修竹朱檻俯流泉雅
致軼天外俗物無眼前笑人聲利場蛾眉競爭妍半生
政坐拙州縣空迴旋自視甘寂寞何心慕華鮮南坡吾
菟裘杖履有厚緣暇日領佳客頗辦沽酒錢愧無絲與

竹後堂欠彭宣何以侑談笑賴有茲山川送鴻煩遠目
落鴈驚虛弦門徑迴俗駕山澤非臞仙劇談交玉麈醉
吟飛彩牋榴花媚紅皺李實薦翠圓相忘恣諧謔小謹
畧跼拳茲遊無可紀須君賦長篇

再和

我詩苦艱澁蹇步太行巔筆乾硯欲裂何地覓湧泉巧
匠愧傍觀袖手不能前敝帚徒自珍捧心豈成妍辟舍
不獲命屬韃試周旋君詩巧層出浥露晨花鮮前輩借

波瀾後生敢並緣平生程不識毀不直一錢五色爛摩
尼八音和相宣挹袂庾開府拍肩揚盈川每發必中的
矢脫無空弦我蓋三復之飄飄意欲仙此計太冷淡浪
費五彩牋不如醉紅裙且聽歌喉圓況當荷傾蓋莫待
粟過拳徐看騎鯨伯一斗揮百篇

再和

雨驟頻垂脚山高故隱巔南坡疑斷路平地怪流泉猿
鶴誰為伴鳬鴻亦墮前梅黃雖借潤榴火漫呈妍人世

隙駒過天形磨蟻旋雲容愁暮合霞彩望朝鮮已負杖
藜約宜修香火緣江山如得助風月敢論錢今日苦不
樂此情誰與宣高歌懷杜曲晚賦擬樊川屋破時懸溜
弓驚不受絃好邀沽酒伴却羨泛舟仙竹色杯中綠花
光筆下牋左持還有蟹右畫更成圓自笑牛刀割難安
鷄肋拳補天非我事聊爾繼新篇

再和

君家有西園望我南山巔觴詠繼曲水花石希平泉長

溝流砌下遠岫列楹前春風一披拂百卉為渠妍迨茲
夏日永杖履宜盤旋梅黃已過雨清潤霽景鮮主人雖
好事欲往無由緣似聞三徑深日夜長苔錢行當載酒
過高情與君宣飛鴻渺天末浴鷺來平川良辰恐易失
勿待月下弦前者坐中看俱是桂堂仙酒豪倒金壺詩
健輕華牋琴弄朱弦古碁枰寒玉圓君才尤中的霜鶻
無空拳諄復記幽會春容看大篇

和姜總管喜民間種麥

腰鑣刈晚禾荷鋤種新麥田家競作苦焦豚勞歲夕翠
浪慙初懷黃雲期後獲晴暖得天時肥瘠隨地力勝欲
觀風謠未暇履阡陌寧唯餅餌香庶免鞭笞責擬踏青
州麴釀酒邀佳客

病起據案無緒輒書二十五韻呈簿尉

祇役來異鄉瘡鬼巧伺便寒熱五行大小六七戰初
如蹈陰壑赤身卧冰霰繼若煽紅爐虐焰工煅鍊先生
但堅壁高卧觀物變謂我則忘吾曰舍其猶傳童子更

進藥先生強起嘔羣鬼競擲掄醫工何瞑眩忽然汗四
出心愧顏有覩湏臾返清涼輕健欲舞抃寧唯疏枕簟
便覺美餽饍氣和疾自去福至禍亦轉我生多蹇剝縣
尹劇卑賤王事有期程私室敢安宴日出事還生孤游
無一援訟牒猶山積愚拙費裁剴催科正火急日夕族
訶譴督郵顧小忍斗米那可戀彈琴不復夢據案敢告
倦仇梅二友生灑落邦之彥頗復相料理何嘗語遊衍
城南萬荷花浣溪錦一片涼生雨初過香度風微扇碧

筭亦易辦白墮儻可薦詩以代折簡辭分非黃絹

除日獄空唯欠租監繫頗衆因悉縱遣之期以
開歲五日畢來因記東坡先生倅抗除夜直都
廳囚繫皆滿題詩壁間輒用其韻

訟牒日已稀私幸庭無留胡不了租稅顧為此拘囚催
科迫星火對案亦包羞作苦念田家歲莫得少休羔酒
會鄰里盍歸與婦謀刻期亦人耳吾其反自修

病後有感作

今旦病思清把書坐晴簷體舒百息勾心遠萬慮恬收
視等庖郢妙觀到羲炎頃忘饑寒苦但覺中邊甜習氣
尚稍稍自喜良沾沾故家東堂書高架紛懸籤我時且
兒子氣欲俱并兼澆着胃次間政爾意不廉此意竟蹉
跎衰遲侵戟髯邇來又留滯鬱鬱三年淹是秋節物高
露白原草霑斜河轉空濶夜氣方森嚴此日足可惜黃
塵滿征旂明年會當歸赤米薦白鹽繡經慰老眼甘作
書蠹潛共嘲玄尚白指笑突不黔亦知屠沽兒羔豚方

屬饜

和張伯子韻

士流競彈冠州牧紛勸駕器識在所先文藝乃其亞
竭來同抱關因得奉餘暇軟語雜嘲諢小酌見蘊藉官禁
不通風門鍵那容罇豹斑縱未窺鯨背幾思跨君來怪
已三我到嗟方乍前頭萬木春當戶三星夜棄甲勿復
來背城寧一借新詩抵驪珠歸橐何妨詫

詠麥

平生笑盜儒口誦青青麥刻燭和新詩此夕知何夕六
花來未晚三白會有獲雨暘亦天事勤惰繫人力何妨
縱牛羊況已遍隴陌青黃未交時補助豈無責我亦念
歸田聊作數旬客

和姜總管送別

富貴如浮雲于我初何有轉徙浙東西僅足餬其口去
年在吳興民物猶未阜賑荒事方殷奚暇詩與酒今年
到東陽政成不待久邂逅遇詩仙襟抱得細剖切磋愧

子貢起子幸魯叟琮瑋蒼玉佩關鍵黃金鈕擬學西子
顰益愧鄰女醜賡酬強追逐要是非敵手目短曹劉墻
氣轢鮑謝囿我如武成策第可二三取山澤多蛇龍松
栢無培塿緬懷南澗老斯人骨已朽人事真好乖又假
蘇臺守遽辭山水邦暫缺雲龍耦酒罷雨沾裾船開山
入牖似鶴出樊籠如魚脫窠臼分袂却關情鼓棹猶回
首長篇肯贈我字字炳星斗願保歲寒心莫愧金石友
和寧國守沈察院九月嚴霜十五韻

九月十月交卦應西北乾少昊猶執矩玄冥遽行權慶
元敦牂歲夏無雨暘愆早禾既有秋人斯望有年晚稻
亦懷新穎實相接連不間東南畝寧分左右肩嚴霜忽
早降節候無餘暄黃熟乃無日青乾空在田殆不如稊
稗那敢詠好堅造物豈棄遺繫時失後先農夫亟欲訴
有司不謂然課無責之有何異扼其咽使君惻興念官
租為渠蠲作詩寬彼憂至哉仁人言幸甚宣城民信乎
有二天

冬至念母

兒行十里程母心千里逐昔者子曾子不忍離一宿今
我獨何為旅食久輦轂來時月中秋坐待陽初復薄命
難推挽闊步窘邊幅慰藉煩友朋栖遲愧僮僕畫餅唐
生相說河嚴子卜世態方奔競人情慮反覆夫豈不懷
歸所惡在欲速眉壽翠濤春洞庭霜橘熟亦足盡親歡
何必此徵祿

秋日同官遊聖感寺晚飲范公亭分韻得須對

二字

招提城東隅勝集僚友俱腐儒元自臞午飯厄齋盂不
如計一醉況有高陽徒小秋頗解事鷄鶩營庖厨我歸
與婦謀但問酒有無婦言有斗酒待子不時須

木末好風來山頭涼月朏快哉城上亭登臨吾亦再堂
堂文正公精神凜猶在盃行且停飲四座俱起酌義氣
激余衷豁若挹沆瀣此夕飲也清且無俗子對

次早再出

晨起候鷄鳴我車催發軔列炬犯星微衣襟蒙霧潤將
迎恐後期奔走追前進拭面愧緇塵墊巾憐雪鬢吾年
已如此世態何當徇曷不歸去來榮枯才一瞬

秋雨歎

少昊欲行秋驕陽猶跋扈炎蒸不易滌頗費天公雨浸
淫三日霖雲氣政旁午所慮早禾傷佳實卧場圃翻思
向來旱南畝生塵土矯首望雲霓一滴如膏乳及茲收
斂際反以多為苦蒼蒼匪天歟惻怛羣物祖怨咨尚未

免是非何所付會當返秋陽新晴照區宇禾實趣登場
不特盈我庾荷擔賴肩歸亦足慰田父黃鷄能漸肥紅
酒幸可酤持用答豐年造物儻復許

和張文潛有所嘆韻

老驥困鹽車四足若有絆鶯鳩搶榆枋控地不能遠我
本田家子釋耒事游宦少壯耻干請老大誰推挽撫字
亦徒勞催科寧趣辦於心儻無愧此首何妨俛財由政
事足軻也豈好辯苟得而富貴孰若甘貧賤

和陳倅留題奉聖

飛鴻渺天末目送類中散
謫仙負詩狂直欲摘星漢
白雲千丈峯金碧美且煥
忘言老瞿曇祇作空花觀
軒冕儻來耳世事亦其漫
鸞鳳在赤霄寧肯就絀絆
惟餘憂國心撫事輒悲怨
飢饉有流離十室九不爨
上動黃屋念每日不遑盱
公豈愛登覽微意寓篇翰
山僧遽傳似字字如珠貫
勸分豈無術未必愧鞭笞
升斗倘均惠溝壑庶少逭
福星公恐是疇復虞歲早
王事敢告勞行役春

過半鬢絲禪榻畔綸巾時一岸溪山得勝賞歌舞廢屢
按請頌海沂康民謠茲可翫

和陳倅遊石門弔瞿硎先生

我坐南坡上高鴻忽飛去指點夕陽外文脊蓋其處

原註

僕家南坡之西
政見文脊山

下有奇洞府有道乃宜據鹿裘坐石室

先生豈真踞儻是我輩人傲視非所慮桓溫汝何為乃
欲效三顧姦心妄窺鼎未見神合沮猿鶴亦汝羞未易
飲食舉伏滔不自重且為溫所遇贊詞縱云美所耻非

所慕邇來賢別駕物外欲軒翥功名恐未免溪山亦已
飫五字識巖石千載想風馭神交付冥漠心契自平素
蒼苔留履跡飛花約歸路先生還一笑晴雲為披絮

林子長見示悼鶴之詩若不能釋然者因次韻
以廣其意且於鶴不能無責焉耳

君家青田姿見之毛骨寒方當秋露警遽迫夏景殘年
來縱飲啄意外失防閑誰歟不具眼斃之于汝安竹林
有餘蔭荷塘豈不寬正坐出門誤寧虞行路難因思出

處理士君子惟艱方其窮居時孤進無還丹山林欲長
往鍾鼎夫豈慳一朝隴書至倏若登天翰肉食無遠謀
伐檀譏素餐失身墜戮辱無乃佞與姦逐兔牽黃犬東
門那得還竟死咸陽市慟哭何辛酸丹塗布衣願恨不
嗣與管富貴履危機悵望扶搖搏世事亦墮甌天理真
循環向來京口銘俯仰成悲歡世無薛公筆想像付永
歎

和萬元亨舍人送芡實

吳興魚稻鄉來視刺史印適丁饑饉後倉廩無餘蘊當
饋不下嚙寧望饌中雋年來稻如雲便覺搖其吻豐年
百物熟天意毋寧靳君侯有佳惠芡實粲光潤東山願
不違南蕩居其近此物舊知名原註南蕩
鵝頭有名採擷手自引
剖蚌訝珠還泣蛟疑淚迸軟溫新剝肉釘飯初嘗醞遺
我水之濱此意君其問

七言古詩

和王天任喜雪

姑射之山果何如往者吾言聞接輿肌膚冰雪能綽約
是中知有神人居神凝自使年穀熟況有疵癘煩驅除
乘雲四海聊戲劇磅礴萬物同慘舒至哉河漢已無極
俗士區區窮尾閭

我家四壁真相如晨興欲出無車輿獨騎瘦馬南坡下
閨風十二仙人居書生一朝忽富貴瑶林瓊樹環玉除
梅花失喜為三白一枝放我眉頭舒春風醉眼紅綠亂
爾時獨醒如三閭

送隱靜恭老

妙喜老人骨應槁明月堂空迹如掃叢林耆舊半消磨
砥柱頽波餘此老五峯深處開道場道價重於連城寶
我蓋知名二十年長恨識師之不早竭來陵陽第二峯
一笑相從即傾倒午牕對坐語笑清夜榻歸來魂夢好
大顛理勢恐是渠澄觀公才何足道青衫我亦行作吏
未盡俗緣多病惱相期巢父早掉頭共住山中拾瑤草

和中本留題照石詩

故人別來知幾年怪我相逢鬢鬢白看鏡功名不用頻
蒼苔徧教留行跡蚤知宇定發天光未聞終日介如石
此理昭然何足疑來詩併遣鐫崖壁

贈孫尉姑蘇紫石鉞孫有詩次韻

吳儂生長水與雲不採蓮花拔蒲根窮山鑿石出奇怪
顛坑仆谷無寒溫宣和倖臣以佞進橫江花石如雲屯
造化有此誠瘡痍奈何浮靡誇朴敦守令誅求星火迫
州縣驚擾河漕翻舉觴誰酌斟攬子我欲從之以爲昆

爾來釗作短尾鉞形模簡古得全渾遺君日以烹龍鳳
要和松風瀉潺湲彌明譏評二子媿盧仝風味千載存
搜攪胃中萬卷富傾動筆下三峽源可憐長安貴公子
飽餐荔支饜河豚豈知是中有佳趣目方忤視手不捫
武夫丁字且不識一礮擬落天驕魂平生攘臂咤飛石
唾取青衫明主恩書生調度清且苦臭味不同誰與論
祝君勿遣羊羹汚以友石供古銅盆

食後過竹堂風雨遽作賦所見

雲氣四蒸雷蓄怒山雨一來風借助
抱頭乳燕竄低簷
喋口黃鸝在深樹竹圍萬槩齊驚呼
老松不動如亞夫
何人筆端帶三昧畫作竹堂風雨圖

監學同舍錢南康新使君黃雍文分韻

人生五馬古云樂今君此行殊不惡
君才自是瑚璉器
十載聲華滿臺閣胡為忽厭東華塵
一麾要把江之濱
聞道豐登少公事姑與匡廬作主人
到郡莫辭譏屢費
政恐朝來多爽氣山中向有讀書人
為問歸來頭白未

成均同舍餞別新安使君徐子宜太丞分韻

我昔絃歌乳溪側嗟哉所割真鷄肋斯民疾苦得飽諳
離彼三年能記憶丁男箇箇事播殖紅女家家勤紡織
可憐卒歲無完褐縱使豐年有菜色夏稅未畢秋稅來
縣家小緩州家逼拆東補西恐不免剜肉醫瘡寧有極
小儒安敢私其民上官貽怒幾遭劾痛定還思當痛時
至今夢裏猶心惻歛為富州傳自舊誰以留州事苛刻
徐侯固是清廟器撫摩暫遣憑熊軾朝廷選用蓋不輕

祖帳衣冠傾上國德星往矣勿復道田里從茲無嘆息
同舍餞新滁陽使君范子由寺丞于成均芳潤

軒分韻

憶昔飛鳧來上國作縣聲名動宸極今朝頗怪空馬羣
十年所得真鷄肋笑指滁陽有佳處手把一麾留不得
醉翁相望百年間瑯琊自此添顏色

食墨魚有感

誑人吐盡胸中墨不料反為入所得禍變之來非所慮

僅與詩人供一筋韓非竟以說難死揚惲詩成汙刀机
子雲嗜學甘寂寞晚年奇字終投閣撐腸文字五千卷
不救顏回忍飢面三年博士冗不治半生鉛槧寧非癡
老兵兩眼不識書飽食高眠我不如

次韻漢老弟假山

庭空吏散無公事一枕清風供午睡列仙之陬渺何許
化蝶翩翩可坐致夢中意行不識路神前那有車乘墜
立壁延緣蘿蔓綠滑徑行視莓苔翠南遊忽到九疑峯

竹痕斑斑湘娥淚
簫韶聲斷蒼梧雲
石上虛餘千古意
回鑣斜經少昊墟
閭風縣圃窮幽邃
崑崙銅柱高隱天
河流九曲東南被
高掌遠蹠得我驚
二華巨靈留顛屬
三丘却轉問勾芒
首冠連鰲誰所置
蓬萊浪自弱水隔
俛仰之間興已寄
傳聞有棗大如瓜
一笑安期方指示
惡風驟起吹船回
未悟此身在平地
驚驚衙鼓忽驚覺
起來恰見羣兒戲
疊石亭前作假山
列嶂層峯生詭異
有如中怒互拏攫
或似畫眉相嫵媚
神嫵獅子豈其朋

伏虎卧駝非若類珠屏九摺地不惜西柱一峯天所棄
眼中乍見已堪賞夢裏曾遊俱可誌連筒濯水瀑泉飛
薄岸臨坻盤石歸瓦盤拳石養菖蒲小有仇池今見二
乃知仙境只人間跬步不移千里至向來封國在槐枝
我今此夢真相似要知萬事孰非夢何物世間能久嗜
有人夜半欲移舟讀我此詩寧不愧

偶食鷄頭有懷萬元亨沈德遠林子長橫塘三

主人

秋風一熟平湖芡滿市明珠如土賤昔也兼名鴻鴈頭

今茲始識胡孫面

原註主人謂鷄頭作胡孫面者佳

應須我輩賸著語

會有後人來作傳橫塘地主總好事凌波不過空山燕

再和

年豐豈特菱蓮芡米價新來如許賤不孤后稷由已思
誰作顏回忍飢面清朝已拜富民侯太史莫書循吏傳
我今何事不歸田豆飯芋魁甘得嚙

和張簿南坡

春風吹水生碧鱗南坡花事日日新水流花出人間去
應有桃源迷路人四圍山色染黛綠夾道柳絲搖麴塵
碧桃和露真含笑海棠過雨猶橫陳蜜脾未滿蜂子鬧
麥穗欲齊媒雉馴滿堂金玉空為爾不博斑衣膝下春
我今家居奉慈母長年直欲齊大椿每當淑景恣遊覽
白藤肩輿敷錦茵華髮映花更蕭爽朱顏得酒能精神
授柑政類潘騎省舉觴敢望周伯仁仙家日月雖不老
人生行樂須及辰張侯故是名家子萬里碧雲看致身

竭來吾縣驚栖棘少年得祿說及親洛濱侍從追前躅
喜君有此與我均花間不用錦步障鶯蝶近前君勿嗔
雙餅姑餉千日壽待戒園夫休厭頻

和郁簿述懷古風

莫笑當年韓與侯釣魚溫水垂纖鉤鳶肩自是騰上速
安用常何薦馬周先生直氣摩星斗肯來州縣甘低頭
莅官姑欲行所學一猿未足勝衆猴平生一介重取與
邈視不義如雲浮同舍償金初何有從者竊屨還言否

古井新來亦波浪夷途強指如山丘毀言中人以疑似
心苟無瑕何足尤雖然鑠金忌衆口此語不妄聞諸鄒
誰知三月未得祿長飢日典鷓鴣裘不作顏公乞米帖
吟詩肝腎愁鐫鏤詩成險語破鬼膽我慚屬和真蠻謳
願須暇日薦所有君方有行寧少留何妨暫駕揚州鶴
猶勝他人萬斛舟

昨日於竹堂後開一逕通南坡甚近從此便於
往還遂成日涉之趣矣

先生一室如懸磬彈鋏浩歌誰復聽
籃輿每出欠僕夫
蹇驢試跨愁泥濘南坡日涉恐負渠寸步躋攀如折脛
偶向田頭問小溪何妨竹裏通幽徑杖藜從此便還往
出趨晨光歸及暝更遣蒼頭佩一壺醉中却愛風吹醒

春蠶行

今年桑葉賤如土吳蠶戢戢多於魯
葉底時聞健食聲
樹頭颯颯初來雨辛勤出火倏三眠
準擬收功千萬縷
縣官何忍為繭絲女紅切勿事纂組
愚儒請遺天下衣

各使蒼生有環堵天寒歲暮田舍翁白髮霜風吹兩股
林正甫舉似所和雙了巖詩且索同賦

君不見羅敷採桑城南路不肯輕為使君婦又不見銀
釵垂頸負薪歸四十未嫁夔州女雙了何自老山中當
年豈羨西鄰富花前啼鳥春不知月裏姮娥夜相顧寧
為山頭望夫石儻有飛鴻傳尺素莫學巫山十二峯為
雲為雨朝還暮老奴玉鏡誰自料阿嬌金屋知何所明
珠節婦浪悲吟羅襪洛神空有賦蛾眉入宮須見妬

五言律詩

觀園夫種菜

町畦紛接壤灌溉細穿渠坐待佳蔬長應須惡草除向
來師老圃比去遂間居遶屋扶疎處兼尋種樹書

和林子長分贈丹桂韻

月桂天應惜溪堂人與清五枝蒙折贈雙目喜增明紅
藥羞丹禁彤霞避赤城賸聞燒燭賞有底置公榮

原註
末句

紀實
也

雨中偶成呈天任

久雨苦不樂吾廬亦未貧
十旬兼美醞千畝長脩筠
睡蝶頻來夢歌鶯皆惱人
得君新唱和懶病起精神

秋晚矣菊猶未開小詩速之

問訊東籬菊如今開未開
不應辜酒伴寧是欠詩催
屈指秋將盡關心日幾回
霜風不相借何意尚徘徊
酒為多多辦花須早早開
已愆重九約猶待兩番催
明日還何益西風定肯回
游言空自解蜂蝶笑徘徊

再促花

珍重栽培意商量仔細開花心終有待詩句漫勞催莫
恨三秋去須教一笑回但儲千斛酒端的奉徘徊

數詩煎迫太甚再為花下一轉語

蝶自無心懶花應有意開含香特珍寵顧影尚低回畢
竟風流在從渠火急催浮華不相待莊重政徘徊

喜花開

落木驚秋晚黃花徹夜開便教雙蝶舞寧是萬牛回有

酒須頻舉將詩莫浪催淵明千古意為汝轉徘徊

諸公和詩而菊開主簿沃同年乃有褒拂之語
用韻謝之

怪底花心轉知從筆力回不嫌嘲我瘦良是為君開白
雪詞何有黃鸝曲漫催待牽重九興籬下醉徘徊

原註九日

沃文諸
公同集

比收張伯子尚書書報諸公有相招意因賦拙
句

入臺羞結舌去國坐嬰鱗東道今行李南宮乃故人寒
溫煩見問書劄不辭頻向日區區意還曾扣大鈞

與物初無競何人苦見銜馮唐雖白首商皓豈空函烏
鵲新傳喜青蠅漸息讒鴛鴻滿臺閣祇合理歸帆

天上張公子殷勤忽枉書幾年憐潦倒今日遂吹噓貢
喜慚何暮馮招恐不虛吾生真有命造物合何如

韓知府挽詩二首

宦路雲霄近鄉評月旦賢不惟同里巷曾是接官聯西

浙勞裨贊東淮適後先向來吹送意豈料隔重泉

原註
余昨

守平江公為倅及為浙西憲嘗刻
麓之後自淮漕召歸公方守泰州

方美朱輪貴俄驚丹旆新鳳毛看二子鶴髮慰偏親甲
第歸無日名園跡已陳風流山下路楚挽倍傷神

林子中知府挽詩

彩棒初行志華途蚤策勲旋聞鳬舫召徑有虎符分歎
息誰為黨推求誤到君天公還憤憤玉石竟俱焚

原註
君推

金州有曲
祿之事

疇昔因難弟，夤緣幸識君。宦途俱別日，苔水再披雲。
勞苦驚多病，悲涼惜離羣。斗金峯下路，鐸挽不堪聞。

李叅政挽詩

望重三朝舊，年過八秩希。股肱康帝室，羽翼傅儲闈。
北闕恩雖厚，東山願豈違。蒼生猶有恨，不見袞衣歸。

廊廟推良弼，屏藩紀吏師。三孤崇卹典，公座有佳兒。
風節蕭長倩，詩篇杜拾遺。條騎箕尾去，名共列星垂。

末路懷前輩，分符記舊臨。吳興慚薤本，寶婺仰棠陰。
驥

予嘗傾蓋龍門亦整襟無繇陪執紼楚挽寄哀音

叅議余公挽詩

慘澹門闌色淒涼月旦評居官皆可紀當路競知名
火祠庭老鎔銖郡紱輕彈冠公自懶相國詎忘情
假蔭非公志書生若命何高才寧汨沒榮路故蹉跎
仲子能傳業詞場遂決科暮年方慰意樂極又悲歌

和姜總管歸途

城郭迎車騎溪山展畫圖歸鴉翻落葉宿雁集寒蕪酒

裏傾肝膽吟邊識步趨佳人來底暮心俟碧雲蘇

元日小室獨坐情思不怡

坐久無人問愁多莫我娛頗知新歲好却訝五行孤書
亂塵凝案灰寒雪擁爐可能無斗酒牆外雜歌呼

故奚公學長挽詩

詩酒平生興人琴畢竟空儒冠成晚歲尺牘到諸公忽
嘆羣無鶴誰留目送鴻竹林家世事清節見君同

中書黃舍人父總幹挽詩

孝子推慈父明君有直臣豈惟成羽翼況復掌絲綸想
像成齋舊昭回宸翰新固應方寸地種德玉堂人
有子能傳業黃金笑滿籛去華雖不第谷口豈其卿四
海知名姓諸儒仗老成平生郭有道真不媿碑銘

挽余丞相

淑氣含公鼎明時預政機仲山維補袞文子不勝衣南
國恩偏厚東山志偶違一為天下慟無以我公歸

暑路驅紅旆天書趣紫泥長沙元忌鵬太歲又逢鷄挽

鐸春風咽銘旌夕照低冠車紛會奠桃李自成蹊

寶閣尚書凌公挽詩

新學輕餘子忠懷策萬言治安猶涕泣師友故淵源日
曳尚書履風生刺史轡漢庭誰第一殊未遜公孫
未識嵇中散今無元魯山宦游真恨晚逸駕竟難攀閱
月推評旦聞風尚起頑九原那可作蒼弁亦推顏

繆夫人挽詩

黯淡金花誥淒涼栢葉觴

原註夫人以正月二日捐館

開屏慘佳壻

扇枕念諸郎家事千奴橘僊遊一夢梁了知元不朽千載有銘章

萬侍郎母夫人挽詩

閨壺高風在鄉閭美事傳寧湏伯仁長更覺壽昌賢祿養酬初志恩封慰暮年侍郎官已貴遽返閭崑僊

漢老弟去秋留別有明年桃李月春入馬蹄輕之句今其時也因次韻招之

晤言堪慰意別語最關情老我春還暮思君月共明丁

寧期後會容易即前程命駕何妨再聞知四體輕

原注聞知

今年輕健
大勝去年

奚通直挽詩

自昔高陽里嘗推月旦評華簪先德齒朱紱羨恩榮
奴豈謀千樹金方笑滿籬有孫看鼎貴鍾慶驗佳城

元衍曹居士挽詩

與物初無競安居不用名平生惟下澤月旦有南評
歲月驚飄忽鄉閭失老成聯翩先友記百代許同聲

先君無恙日居士得游從酒醺花前月茶甌石上松有

時連欸段勝槩每從容指點佳城處相聞道院鐘

原註公奠

地近西山道院先君嘗指示其處云

故安國夫人挽詩

雅趣工書畫高懷陋鼎鐘家聲推兩太壺範見三從賢
得魯侯配榮開安國封平生耽靜勝宸翰煥鸞龍

闕閼聯蟬冕臺郎有鳳毛美彤管舊節視栢舟高南
澗夫人藻西池阿母桃哀榮生死是詔墨看重褒

堂前東偏松棚清陰可愛為賦五言八句

問訊蒼官舊掀髯肯見臨笑談驅酷暑朝夕托清陰便
引夷風至寧容盾日侵北牕高卧處靖節是知音

再寄廣文俞同年

有客傳新句呼兒整舊書勞生徒擾擾不動只如如病
瘡猶憐我流行也到渠平生真莫逆裏飯肯躊躇

無眠

丙夜不成寐可知心念家人情風上草身世眼中沙宿

鳥司更漏黃蜂集晚衙了忘官府事高枕是生涯

脚婆子

百沸催湯沃孤燈迫睡昏腹蟠餘豕漲足踏但鴟蹲一
衲包纏密重衾底裏溫窮冬為老伴永夜得深論
着瓦霜威重侵牕月色昏相依紙帳夢猶勝火爐蹲伸
脚三更穩回頭一笑溫溫柔非老事付與少年論

官況

漢老弟寄示詩軸想見春時南坡佳興因以二詩奉

寄亦可想官居況味也

流落經年別平安只信通官情元自薄春色為誰濃撫
字愁眉上青紅醉眼中著詩無好語還徃負筠筒
觸手逢人怒低頭與俗同一慚那可忍百巧固應窮酒
有魚旬綠花無百日紅悲歡真破甌墮地併成空

早上過溪報謁林子長承約客回途作

臭味還吾輩炎涼笑若曹相逢傾蓋舊可但泛舟勞夜
雨湖山好西風鼓角豪主人寧避客抵覺杜門高

再和

畫諾何如璫歌呼敢效曹一飢才免死千慮亦忘勞酒
裏愁先醉吟邊句未豪菟裘吾欲老不是故為高

再和

伏日當休沐頑軀困坐曹驟然秋雨至一洗夏畦勞懷
祖何須怒劉伶亦未豪北牕陶靖節千載只渠高

久不得廣文俞同年書頗聞病瘡小詩往問訊
問訊俞夫子魚句不寄書官居還獨冷體力復何如藥

石寧湏爾炎涼一任渠詩能驅瘧鬼下筆莫躊躇

六月請俸張簿攝邑止支其半因却還之

閒居須薄俸未足保妻孥州縣真徒爾兒曹敢料吾揮
金憐橐在儲粟笑銚無敝褐猶堪典新涼要一壺

十月到南坡

觸眼嗟黃落憑高接翠微幽禽私自語寒蝶晚相依醉
熟風吹帽愁生帶減圍功名竟何許尊酒莫相違

將至天目登高嶺

天近初凝目雲橫便躡梯
前瞻千嶂列回首一川低
雨過黃梅盡風來翠剡齊
靈源窮不到晴晝掛虹霓

將至富陽

宦路初無定吾行有底忙
江清魚不聚天遠鴈南翔
整棹須平進回瀾亦太狂
平生湖海意何夢到凝香

和潘簿旅懷

朔風動關塞羈人先自知
忘情須我輩了事豈兒癡
鴈信憑誰寄蛩吟暗自悲
遣排消底物不飲復何為

韓知閤挽詩

一品真王裔先朝長主孫華途聲烈在上閤典刑存閤
里羣知敬朝廷愈覺尊天胡嗇之壽莫迈九原魂
容色雖嚴重襟懷實坦夷功名期自奮趨向肯隨時翻
念懸車樂俄成易箴悲扁舟苔雪上此意幾人知

程待制挽詩

科第聯三世聲名動九垓激昂存壯志盤錯見奇才往
者分邊閫胡然避憲臺教忠知有待餘慶接三台

有子巖廊貴知公衣鉢傳內祠初趣召次對暫迴旋偕
老萊衣喜虛懷帝席前恩榮方沓至遽返九華僊

挽吳公祥承事詩

故國衣冠後傳家禮法尊擊鮮更下舍容駟閱高門河
潤金揮橐風流酒滿樽平生陰德事五世眼中孫
昔過高陽里嘗登通德門敢違鄉黨敬尚想典刑存喬
木縈心曲空花汜淚痕定應歸淨土何必賦招魂

挽承事湯公詩

屋底千金潤尊前一笑真名藍尋入社家事豈關身丈
室空天女凌波悼洛神

原註孺人繼述

鹿門攜手後還有姓龐

人

挽范承事詩

貝葉神怡處南柯夢覺時月評依舊好露挽不堪悲分
米誰懷惠魚金肯拾遺紺蓮華發後見佛想舒眉

挽奚公彥章承奉詩

上國曾傾蓋文闈昔盍簪

原註予與公同赴甲戌太學補試

科名終在

子章服果何心朝露悲蒿里遺風上竹林人琴俱不見
哀挽為沾襟

已識嵇中散誰慚王濬冲鴻飛嗟目斷鶴化駭羣空懶
作金門客寧為鐵面翁後園花木在回首又春風

挽都運徽猷陳君詩

熬海摠忠論潢池誓武威分符留惠愛持節借光輝
閱伊誰似功名與願違未前宣室問遽作九原歸

玉節稽巖召琳宮暫列僊月華方喜見薤露忽悲纏
回

首長安日傷心蜀道天初無封禪議遺藁總堪傳

途中得姜總管詩因和韻

相知何必舊我輩正鍾情老去難為別詩來愈覺清
丹虛和雪載水淺過灘平一路俱佳境收歸五字城

宋宰不赴王倅招有詩次韻

冷宦門羅雀高軒間不過似聞諠捶楚莫恨笑弦歌
會意庭前栢輸香水面荷道人觀物妙宴坐養天和

風號天籟怒雷引雨聲長但喜書帷潤那知酒尊涼夜

光宜月露霽色醒松篁通介從流俗徐公自有常

觸事

製錦無工拙迷途有是非承符何所恃投檄會須歸未
飽豺狼欲寧論鴈鷺肥歸來羞碌碌老去與心違

綠匣何煩至黃衣尚有云催科寧是拙稼穡亦良勤當
念溝中瘠難專柱後文誰令公喜怒鴈鷺政紛紛

歐公詩有云俸優食飽力不用官閒日永睡莫
興因廣之

日長官事少食飽俸錢優
宴坐香凝篆欲眠書枕頭
莫知斯我貴此外更何求
畢竟歸田是他鄉莫久留

偶成二詩

閒處田園好愁邊歲月催
事多違壯志吾亦愧無材
有底金千鎰無何酒一盃
漫憑詩遣興情至却生哀
今夕知何夕吾年且暮年
勞生斫桂斧游宦逆風船
幸不愁婚嫁何須問計然
男兒有門戶溫飽故隨緣

偶和萬舍人中秋有月無客有酒無韻

積陰成久雨，決日掩三辰。吏已疲祈禱，天方殺去聲怒嗔。

但愁雲似墨，那顧月如銀。辜負中秋約，姮娥莫妬人。

即事

天末孤鴻遠，園荒一徑深。畦蔬供小摘，家釀慰孤斟。齋日渾無事，春天故作陰。潘池魚插柳，取次見吾心。

問訊鶯猶懶，尋芳花較遲。忽驚雷送雨，漸喜水平池。竊祿慙無補，歸耕未有期。春工誰道巧，不染鬢成絲。

已是春光晚，那堪雨氣昏。數莖驚白髮，萬感集清樽。才

力須時展功名有命存眼前何足校一笑任乾坤
酷吏人同疾流民天亦憐麥登收兩倍蠶好得三眠況
是寬征賦那憂有俗緣眼前百事好買酒答豐年

舟中

寒日移陰短清溪放溜遲歸田真晚矣泛宅欲何之鴻
送天邊目山橫雪後眉詩中無限興一一報公知

舟中睡起

望外星占婺年餘水記苔去思誰結戀來暮豈聞謠季

布從渠毀馮唐莫我招舟中無一事睡足有今朝

和陳德章春日送客

年華看鬢上春事轉頭中羯鼓催花雨虹橋送客風未
須愁酒債政復坐詩窮誰識揮絃意寥寥寄遠鴻
花柳無多事陰晴不必天急春村外雨並舍晚來烟白
墮先春手紅粧最妙年龐翁雖不出門巷得相連

再和

勝事壺觴裏韶華杖履中歌情千里月花信幾番風取

友須三益論文笑五窮含含歌麥秀廡下老梁鴻
歲月斜川路風流杜曲天過墻紅杏雨低戶綠楊煙鴻
鵲今千里鶯花又一年陽春慙屬和五字得珠連

舟中冬至

陰陽消長際新舊送迎中異縣他鄉泊天時人事同世
方期道泰我豈坐途窮兒女番為壽衰顏借酒紅

和林卿盤隱詩

溪山千里勝花木四時春家釀新來熟園收舊不貧上

都無闕事空谷有佳人天下滔滔者誰能此問津

盤礴五千卷辛勤四十春向來憂國意肯顧在家貧丘
壑寧違性功名恐悞人似聞歸賦後喜氣日津津

徜徉三徑裏陶冶一家春筆下文為富曾中道不貧窮
通知有命行止信非人第恐歸田計翻成要路津

和沈祭酒韻

詩思花前發春光眼底來一區聊自適三徑為誰開聖
主方求舊清時况急才鳳池波自暖鷗鷺勿多猜

和勸農詩

世故偶夷險吾行無介通誰為青眼舊人想翠眉濃

原註

翠眉亭有蘇少公祠堂

風雨花時過溪山酒聖中何時蓮蕩裏共

把碧彎筒

節物常流轉人情作異同頗期千載後寧忍一朝窮隔
葉饒晴嘆遊絲冒墮紅老春何足恨結習本來空

罷郡遊何山

尋山多勝概輟棹偶留連南浦渾無緒東風忽放顛蹊

成桃李退人去蝶蜂喧氣味餘禪榻煎茶竹裏煙

賦芍藥

紛紛時世粧爭欲媚韶光正值三春暮能教一國狂妖
嬈欺酒聖豪麗僭花王不料東風惡飄零亦太忙

晚花

花開春已去春在此中藏可恨芳菲晚翻令氣味長繁
陰供翠幄輕暑絢紅粧莫起後時嘆時來未遽央

往瓜洲護使客回程

北使朝京闕東淮領計臺舟師雖夙戒損食更頻催州
縣愁勞費風霜困往來和盟終不贊舊好政無猜

新晴

凹沼幾平岸晴雲故出溪已添新綠潤尚有暗芳栖風
雨將春去罇罌欠日攜歸田吾未果愧爾杜鵑啼

秋雨

陰風攪林壑驟雨倒江湖白日不覺沒繁雲何處無樓
吟涼筆硯溪夢亂菰蒲聞說京華甚汚泥入敝廬

喜雨

雲釀南山雨，風勾北牖涼。
綠蒲澄水石，丹藕淨池塘。
冷客頻牽興，炎官罷鬪強。
無波真古井，此味淡中長。

和鮑倅首夏聞鶯

芳草池塘晚，垂楊院宇清。
夢回初恨蝶，春去懶聞鶯。
翠幄何須戀，金丸恐見驚。
一枝棲更穩，好去鳳凰城。

道場山勸農

粵在千峯頂，重來二月天。
雨紅晴尚濕，波碧遠相連。
旌

施行雲裏樓臺落照邊一犂農事起胡不早歸田

勸農

郊原春已半溝洫水先通勸相寧文具歸耕亦興濃一
犂新雨後小隊亂山中粗識斯民意何須教鉅筒

慚愧荒三徑羈棲漫一同青春非老事白眼有途窮柳
暗鴉藏綠花飄燕蹴紅平生孔北海未放酒樽空

喜雨

雲氣翻車盖天河注瓦溝滂沱三日雨登濟一年秋旱

火掃無迹狂雷怒不收腐儒營一飽卒歲恐優游

初夏四泊獨坐

芳草沿堤長圓荷出水遲倚欄風醒酒岸幘雨催詩鵲
鵲巢安在仙鳬鳴詎期遊魚知我意吹沫弄清漪

縣中迎石金山甘靈大士就放生池祈雨早上
偕簿尉往炷香

甘雨祈三日香雲捧一龕依歸甘露滅珍重尉頭藍官
事何當了枯禪且罷參蓮花初出水朝日借紅酣

再和

夜起占星畢朝趨禮佛龕擁橋蓮墜粉縈沼水揉藍屏
翳何須靳登伽不受參懸知天欲雨蟻戰已酣酣

再用韻謝王簿來詩褒借過當之意

黃嬭朝千卷書燈夜一龕玄文今尚白袍色故應藍簿
領聊爾耳朝班行矣參驚雷雖破柱午寢不妨酣

再和

早魃爭攘袂羣龍僅守龕雲峯疑燎火天色轉澄藍甘

露元同注叢林莫遍參新來焦渴甚無夢到沉酣

過登源英濟廟祈雨

古廟出靈響吾儕非過求山田雖欠雨陂水尚通溝出
郭漸無日祈年望有秋豚蹄真狹甚明信或堪羞

青山買舟

落日千鳥外青山一望中買舟羣僕喜兀坐與誰同旅
店孤烟起田家曲港通鷗盟暫時乞又踏軟塵紅

喜雨

雨脚初鳴屋風頭忽轉廊餘涼生簟枕好夢到池塘黃
嬭真三窟青奴得雨忘功名休恨晚身世一藤床

七月初得雨後大有秋意

好雨真無價炎天不易求十全成稔歲一上作音涼秋

吏道陂塘責

原註近歲上
司督責甚峻

民寬溝壑憂催科無奈拙此

去恐優游

除夜書懷

吳楚鄉風異悲歡物態多歲華驚晚暮吾道恐蹉跎莫

唱黃鸝曲寧為白石歌明年六十一不醉待如何

葉大猷挽詩

月旦評猶在題輿事已非田園寧作計鷗鷺本忘機此
地期相款終天願忽違西風送丹旆老淚不禁揮
非意俱飄瓦高懷只杜門誰云九地底猶抱十年冤未
盡滄浪興難招楚些魂傷心追往事愁極却無言

淮西趙漕子固挽詩

疏抗廷臣右經傳弟子行江淮歸德政蠻貊誦文章世

路風波惡仙家日月長
西林曾有約楚挽莫淒涼

西帥予曾忝無何馬首東
計臺初不遠交篆竟成空
夜

壑移舟半淮山落木中
堂堂寧復見丹旄獵霜風

原註
予合

肥赴罷前後皆公攝
事然竟失於一見

楊伯賢挽詩

月記鄉評好年推輩行
尊巨山曾入夢楚些莫招魂
太
息馳駒隙渾疑隱鹿門
他時耆舊傳知有姓名存

王彥謨挽詩

蚤歲游三舍明經東九師聲名雖烜赫科第竟差池之
子能傳業興宗會有時只今官冢地看出印累累

潤屋金千鎰浮生黍一炊里閭思長者門戶托佳兒華
表終來鶴支牀尚有龜洗心元悟易杯水漫勞持

章解元挽詩

詩禮傳家舊田園晚歲豐月評猶未改露挽遽成空曲
巷連桑陰幽巖長桂叢南坡吾獨往無復訪鄰翁

楊仲才挽詩

孝友懷宗族謙恭接里閭克家千樹橘教子萬籤書
釀酒偏延客能詩亦起予天胡中不壽埋玉恨何如

別意經時序音書缺置郵子來方問疾傲吏已移舟
華屋生存處佳城身後謀望風懷執紼老淚為君流

和太守

豈弟循良守功成意益謙尋求七字律想見一生廉
活火烹茶藥消愁媚酒帘南樓月華好吹笛指須纖

寒食風雨呈林正甫

不住風和雨思歸日似年他鄉寒食淚深院落花天午
枕飛蝴蝶春山叫杜鵑有誰憐趙壹骯髒倚門邊

春大閱望郡圍齊雲樓悼亡

官事誰能了浮生迹易陳齊雲連綠蔭和淚送青春緩
帶空凝月憑欄不見人只應曾到處愁極倍精神

三月初一日晴色甚快人意晚宿撮石嶺陳氏

書院

昨晚雨不止今朝天假晴路乾里堦縮人健板輿輕父

老驚相顧親朋漸出迎端知華表鶴珍重故鄉情

喜雨

梅雨知時節農家喜若何積薪蠶下箔鋤水稻分窠綠
有筭成竹黃無麥作蛾一春嘗苦旱三日未云多

次韻漢老弟對月滿飲

鶴髮金挑母蛾眉萼綠華月圓香度桂飲罷燭生花何
惜尊空酒能令春滿家更邀重九菊醉裏墮烏紗



欽定四庫全書

集部

尊白堂集卷二

詳校官右中允_臣薩敏

主事_臣呂雲棟覆勘

謄錄監生_臣章儔

欽定四庫全書

尊白堂集卷二

宋 虞俦 撰

七言律詩

和孫尉登空翠堂鼓琴酌茗有懷冷令二首

樓畔晴嵐翠拂空
天教我輩一尊同
只愁楊柳歸來綠
却嘆桃花去後紅
春事又還觴詠裏
人生正墮別離中
不堪搔首東南望
獨立驚風嘆斷鴻

花滿芳洲月滿樓
留連從事到青州
巧分茗椀消磨睡

靜拂琴徽斷送愁寒食烟花知有幾上元燈火恰纔收
冷官已辦江頭費爛醉春風典破裘

絕市無糯旋按青穗日熬以釀戲成

種秫無多望歲穰無功何日果還鄉尚無彭澤五十畝
安得謫仙三萬場按穗昔聞今始見撥醅未熟且先嘗
今年太歲還非酉慚愧隣家僅得漿

十一月二十八日用後山詩韻

日暮江東天一涯孤雲飛處路何賒雪將入臘未破白

梅過先春競着花過眼光陰渾是客滿懷風雨政思家
何如醉裏都忘却擬向窮途問麴車

石芥

杯酒流行四座傾此君風味始崢嶸搗殘薑桂嫌無韻
掃盡茅柴不到醒崖谷野人羞自薦膏粱公子莫知名
攀蘿採擷天寒甚誰念終朝掬不盈

林正甫與予中春並命為御史正甫按刑浙東
道別去兼旬而予銜命按視宮陵經越上獲一

再款語臨行有詩因次其韻

烏臺當日選名流，僉謂君才與我優。
公議略伸君便去，上恩未報我寧留。
自憐秦緩難為疾，豈意良霄尚有猶。
況是親年當喜懼，欲將歸計問扁舟。

銜命宮陵偶一回，山陰道上得徘徊。
溟鵬好在思搏擊，乘鴈何嘗計去來。
萬壑千巖況秋色，明珠白璧更塵埃。
相逢未穩還為別，一段詩愁費剪裁。

秋釋奠于學，萬舍人示詩次韻以酬。

昔年泮水忽專城文會何妨一再盟已媿簿書成俗吏
却陳俎豆見諸生一時同隊魚猶在千載重來鶴更清
況有卞峯青眼舊試登傑閣快雙明

脚婆子

此姥原無妬與嗔平生氣類竹夫人蛾眉漸遣溫茶夢
鵝腹猶疑見在身包裹形模才一衲薰蒸湯沸穩相親
承恩脚底非由貌啓沃憐儂夜夜新

三十日乃耘老弟生朝余護客舟行高郵道中

不勝戀戀之情因賦鄙句以寄之

愛日初看一線遲

原註二十
六日冬至

門弧喜氣又相隨遙知綺

席團樂處正是蓬窻寂寞時節愛堂中先遣信富陽驛
裏舊吟詩生涯已是千奴辦且泛新陽入壽卮

仲本別去才半月爾瞻戀不啻如隔歲奉此寄
懷

紛紛覆雨與翻雲只有吳人不世情窮迫每憐長袖舞
別離愁聽短歌行春波碧草連南浦朝雨垂楊拂渭城

絲竹未應陶寫得向來肝胆為渠傾

仲本索歸甚遽前詩送行言之不足見示和
篇覽之益用慨然再用前韻

幸有綈袍戀故人不應回棹遽忘情相逢且話十年事
此別又成千里行歸去我猶慚靖節催科誰解恕陽城
原註來詩有丁寧莫
被催科擾之句故云

黃堂今有仁人在壁水當年蓋已

傾

別後寄主簿

塵埃裊積顏如甲丹墨紛綸眼有花君去何人堪共語
秋來無夢不還家飄零酒醖今真止冷淡詩筒不復誇
莫使音書成斷絕風前鴈字政橫斜

余假守是邦所幸今夏雨澤適中高下咸宜客
有謂今秋一稔前此數歲未之有也果爾則幸
矣因喜而賦豐年之詩

騷人墨客可無詩正值秋郊刈穫時此日三登殊可樂
向來半菽亦堪悲家家芋栗兒童喜處處鷄豚父老期

負郭有田歸去晚婆娑拙守不勞麾

除兵部侍郎賜帶趨朝參

幸叨持橐侍甘泉敢意思榮慰暮年紫綬金章光照地
絲鞭玉勒喜朝天兒曹莫起無魚嘆人世難為跨鶴仙
報國無功還自愧直須及早決歸田

王誠之分惠卧龍新茶數語為謝

卧龍驤首奮輕雷一一槍旗次第開遽浥春風歸七椀
寧容卯酒困三盃森嚴莫訝先嘗苦雋永方知後味回

不羨金釵候湯眼可能蕭寺略追陪

謝周晞顏寄惠新芽

摘鮮分送細茸茸知在春山第幾重
包裹雅宜青箬節寵珍寧羨赤囊封
礪驚雪落巖前石烹訝風生澗底松
堆案文書吾欲睡賴渠喚醒小從容

以蓮心茶送顰使君小詩將之

未雨餘寒力尚嚴巖前蚤見摘纖纖
初嘗似帶蓮心苦迴味寧輸崖蜜甜
渴想清香凝燕寢更餘黃卷亂牙籤

一甌幸入春風手
微草從今價亦添

再和

採得蓮心苦更嚴
青裙白面退尖纖
竹軒旋碾香塵散
槐夢初回齒頰甜
況是澄泉元帶錫
自應佳句合編籤
直須陪侍揮談麈
習習清風兩腋添

以酥煎小龍茶因成

水分石鼎暮江寒
灰撥磚爐白雪乾
鱗眼已收魚眼出
酥花翻作乳花團
撐腸尚有書千卷
枵腹無憂食一簞

只欠綠珠煎點在詩情寧使愧麤官

有懷漢老弟

先自無聊懶出門南坡一到一思君
松筠俱是栽培力
亭榭無非卜築勤
本約暮年栖息共
豈期中道死生分
風前試數當時鴈
一鴈今歸何處雲

缺落槿籬須補綴
稀疎菜甲欠鋤耘
芙蓉泣露坡頭見
桂子飄香月下聞
策杖却愁成獨往
舉杯誰與醉濃芬
歡悰莫訝年來減
觸目無非是憶君

村童先遣掃柴門
檢校園芳待置尊
叢菊稍斑溥露點
芙蓉已帶着霜痕
詩篇縱好成孤諷
心事憑誰與共論
已是西風悲落木
那堪幽獨更銷魂

有懷廣文俞同年

宦遊霜宿與風餐
環郭青山豈曰盤
餘暇每思親丈席
新涼政喜入中單
交情老去才方見
世事年來亦飽看
顏色想君如李白
却疑明月滿重巒

客來愧乏牛心炙
茶罷空堆馬乳盤
縱有詩篇慚和寡

了無心印可傳單平生黃卷能忘味晚歲青山未厭看
歸去吾廬吾亦愛更須華屋羨雕爇

祝君努力且加餐世路羊腸政屈盤烹鯉何由問消息
割鷄政自困平單書生說食真成癖俗子疑人莫與看
搜攪枯腸有文字玉州猶愛月團爇

萬山深處祗空餐報贈慚無雙玉盤日晏僅餘晨粥半
夜涼更覺夏衾單憐渠許國丹心在付與窮途白眼看
它日鷄豚燕同社不煩父老見思爇

旅懷上石似之郎中

妄意彈冠不作疎向來曾是曳長裾倚門慈母須微祿
當路羣公亦薦書杜曲詩成還贈蹬河東賦在有吹噓
上林不敢棲高樹斗水何妨置腐魚

騷人先自不禁秋風雨相將作許愁尚有壯懷因酒到
苦無佳思慕詩休故鄉音信新來鴈盡日笙歌誰氏樓
滿目黃花笑憔悴未應回首沒江鷗

暮鵲投林意自深向來一諾抵千金面看逆旆有歸色

足望窮途無好音
歲晚更憐霜點鬢
夜寒除是月知心
政應老死何須惜
或有遺書備訪尋

余秋初離庭闈冬至猶未得歸夜讀宛丘先生
秋日憶家詩輒次韻以述旅懷

屈指西風閱歲華
半年行役苦思家
綵衣歸去親闈好
畫角吹殘客夢賒
病裏中秋慵見月
醉中九日強簪花
竭來又過書雲候
節物催人一可嗟

初八日早出洪澤閘泛淮

乾道年中再講和當時議者厭干戈長淮不管蛟龍怒
巨艦寧容鵝鵠過歲晚民方愁道路天寒我亦困風波
中流擊楫非無志時運相違奈若何

和俞孚仲遊南坡

列岫崢嶸棟宇連平欄曲砌俯氓廛坐談風月三千里
直傍雲煙咫尺天栗里尚懷陶靖節竹林還想杜樊川
冷官幸有田園樂笑謝蘓公乞酒錢

平昔相期汗漫遊杖藜還肯訪林丘君來便覺客不惡

我醉無言山自幽
栢子乍燃香拂袖
酪奴初試雪浮甌
慈親眉壽閒居好
誰道周南嘆滯留

秋懷

登樓何處不陳詩
況是秋高木落時
極目但隨歸鴈遠
老懷猶作故鄉悲
母寧觴詠須前輩
有底功名亦後期
試問沈郎那得瘦
此心元不慕州麾

結髮從來數亦奇
人言猿臂不遭時
詩成杜曲何多興
賦舊蘭臺只浪悲
松菊不關年少事
冰霜曾與歲寒期

君看昨日涼風起
瓜上青蠅豈待麾

余護客至盱眙
忽有召命應廣文
有詩相慶因用韻以謝

尺一西來喚我歸
扁舟正是泛淮時
功名不復平生夢
物色能銷幾首詩
去國九年嗟已老
暮途雙節偶然持
一丘一壑真吾事
慚愧夔龍集鳳池

九日南坡兄弟同集

曳杖攜壺意頗長
了無風雨破重陽
團欒飮座橙方綠

蓓蕾扶籬菊未黃
醉裏茱萸須遍插
尊前鴻鴈政成行
持盃快嚼誇強健
只恨雙螯未著霜

和九日南坡小集

風雨年時政不佳
山翁無酒向誰賒
又還九日看黃菊
却喜晴天映碧紗
有底尊前悲節物
只應醉裏送生涯
明年徧插茱萸處
目斷西飛雁影斜

九日雨

滿城風雨不禁秋
寧是先生懶出遊
採菊未成三徑約

看囊尚有一錢留催租有底闕詩思落帽何妨付酒舟
今歲重陽還是客湖山信美豈吾州

和安撫王誠之給事重九日登高詩韻

登臨興引越山高醉眼何曾識二豪戲馬向來誇勝餞
卧龍此去記吾曹風前短髮還羞杜筆底新詩欲和陶
賴有蛤蜊風味在固應居士笑盧遨

再和

秋鴈初飛幾點高卧龍送目十分豪且容司馬吹紗帽

莫向參軍問騎曹
飲吸百川從酩酊
詩驅萬象入甄陶
菊花開日重陽
是有暇何妨更一遨

再和

眼橫秦望接雲高
不獨詩豪酒亦豪
豈是過呼韓吏部
未應輕比漢功曹
尊空北海懷文舉
菊繞東籬念老陶
只恐詔歸天尺五
直須秉燭與公遨

吳守相邀壯觀登高坐中出示佳篇因繼韻以酬

壯觀登臨引興長
黃花亭下未經霜
江平鴈到涵秋影
野曠鷗歸帶夕陽
佳節欲酬須酌酊
今年在處說豐穰
楚雲不動淮山碧
且緩笙歌酌羽觴

吳守置酒壯觀為登高之集因賦數語

九日登高作勝遊
使君攜客此遲留
天連楚觀風吹帽
木落淮山菊滿頭
何處臺前猶戲馬
幾人江上不驚鷗
年來只有身窮健
莫把茱萸浪自愁

有懷南坡蓋雪阻旬日不到

催年節物太頻頻不涉南坡又一旬
蒼檜風前應強項
玉梅雪裏想精神
後車同載有名酒折簡欲呼無可人
說似阿連須早計
鶯花休擬負青春

使北宿留盱眙

浩蕩春風吹客愁
誰教楊柳繫行舟
燕然有約終須到
淮水無情只漫流
蝶弄風光還草草
鴈傳消息底悠悠
梨花寒食無多日
且傍南山作勝遊

林正甫寺簿舉似所和判院徐同年詠所居詩

且俾同賦

二妙詩情僕命騷戲驅萬象入甄陶三休亭上頻回首
八節灘中穩着篙巢幕祇應憐乳燕戴山誰復笑靈鼇
也知廊廟須公等寧羨華堂數仞高

謝廣文俞同年惠魴魚

朝朝麤糲腐儒餐清坐焚香篆印盤早計何嘗為溫飽
倦遊誰復念羈單甕頭社酒欣方熟籬下秋英漸可看
更寄拈魚君有味鼎烹曾覆晉之轡

杜門絕俸呈陳倅

家食年來嘆不充，支離受粟信無功。
白頭慈母須微祿，青眼何人到寓公。
未辦殺鷄留郭泰，更能給俸助盧仝。
半生畫餅真堪笑，已戒奴星好送窮。

學錄李詩翁以詩訪予于乳溪之上，且求縣學積俸，偶值窘匱，恨不能滿其意，漫以數語送之。
弟飢來不堪煮耳。

二月江南花氣昏，錦囊詩話喜重溫。
百篇換去東湖骨。

一醉招來北海魂
投老黃塵真左計
半生青眼向誰論
學宮乞俸能多少
驢子憐渠蚤候門

勸漢老弟飲酒

尊前一醉莫辭頻
三萬場當歲十旬
況有好詩能泣鬼
寧無妙畫可通神
快呼左手持螯客
莫著傾身障鹿人
綠漲大江渾是酒
蒲萄波面已生春

送林子長赴姑孰泮宮

綠波風駛引征帆
九萬扶搖入羽翰
詩句最憐雲不定

宦情況與月同寒襟期莫作別時惡出處須留晚歲看
漫道江東懷李白清才應合在金鑾

和鮑倅暴雨大水之作

坳堂方笑芥為舟驟雨俄驚滙衆流天漏不知何處補
地卑轉覺此生浮會須擊水扶搖上政想乘風汗漫遊
宦海陸沉聊爾耳詩人休詠白蘋洲

以新米作撈飯有感

老矣何妨受一廛笑渠楊惲強歌田驚心赤地三年旱

慰眼黃雲八月天他日江船來白粲暫時水碓搗紅鮮
軟炊香飯憐脾病從此長齋繡佛前

自嘆

落落高才豈晚收枉將歲月送菟裘未能鵬擊三千里
空費龍驤萬斛舟明月有珠誰按劍珊瑚作網漫沉鈎
求田問舍非吾事豪氣元龍死不休

明經青史不難收怪底依然處士裘誰謂封侯安事筆
我聞定霸必焚舟驥騰夷路須聯轡鰲負三山好擲鈎

對策清時看第一未應蘊藉愧裴休

冬至後五日夜雪復作再用韻

燈火黃昏漸漸收烏薪已盡典輕裘自筇浮螳床頭甕
誰繪新鱸江上舟卧聽玉霏驚漸瀝起看瓊樹怪聯鈎
多應武仲添詩興下筆翩翩更不休

綠野功名一戰收何如危坐擁狐裘歌兒解咤銷金帳
酒子能添藥玉舟莫為溫菜尋伐斧免勞服餌到懸鈎
誰言柳絮渾相似惱亂春風恐未休

銀燭生花香霧收中堂密坐促貂裘羊羔兒酒浮瓊筍
牛尾狸酥映玉舟扶醉緩歌金縷曲怕寒催下畫簾鉤
紛紛擾擾成何事且鬪尊前一笑休

移守吳門酌別姜總管

宦遊踪跡一浮萍末路從公益已傾方喜溪山來入社
忽驚絃管作離聲河梁戀戀看雲別剡棹看看載雪行
從此江東還渭北莫因契闊負詩盟

黃仲本自浙西漕幕得倅臨安暫往寓居德清

遽然話別詩以送之

外臺賓幕始知名見說君王念老成此去監州真有命
向來相國詎忘情吾儕老矣難為別世路悠然莫計程
強說從來還信否一篙春水片帆輕

得旨與郡歸自浙東余成卿王貫之葉德遠追
送至于震澤舟中款語數日而後別

懷抱連宵得好開莫愁波浪與塵埃中年已是難離別
此地何妨數往來送我扁舟寧作遠喚人歸鳥苦相催

邈然後會知何處更欲臨分把一杯

和湯倅留別

官冷門前可設羅高軒多謝肯相過別離漸近那堪說
觴詠從今莫厭多風月平分聊爾耳雲霄咫尺奈君何
漢庭行且迎枚乘南浦從教恨綠波

端午日用韻

今朝端午懶吟詩此意兒曹莫遣知萱草著花空有恨
菖蒲稱壽永無時遠途日暮休回首近事風傳只皺眉

角黍堆盤何處奠沉湘千古使人悲

無眠

蛩吟砌下豈知時我亦無眠有所思夜永只憐燈作伴
秋涼最許簾先知十年擾擾夢中事一笑悠悠世上兒
數盡更籌窻送曙起來贏得鬢成絲

拒霜

纖枝綠葉競成叢誰障西來落木風霞散纏頭千丈綺
春回醉面一番紅伶俚欲嫁還羞晚梳洗隨宜不愛工

況是秋高花已少對花莫放酒杯空

聖龍長老資公求修佛殿疏余不暇作也昔丹霞燒木佛院主墮落鬚眉普賢勸修古佛末後童子證果居士舉此公案二段以問聖龍若下得一轉語則佛殿一時修了其或未然定又去眊擾檀施矣因作山偈奉送只此大勝作疏頭勸緣也

風雨飄搖紺宇摧百身古佛盡莓苔政須豪士修檀施

定自諸天打供來向晚鐘魚猶短氣只今龍象亦生哀
道人莫憚朱門去會有清蓮一朵開

烏程宰十三日往龍洞禱晴歸言見田家兩岸
車水其聲如雷魚刈獲甚忙若得旬日晴則農
事濟矣因作田家歎一首

慚愧田家趁好晴鷄鵝兩岸水車鳴畦丁露宿腰鋤健
饑婦泥行腳板輕作苦僅能供伏臘有年何處不昇平
只愁官裏催租動里正敲門涕似羹

千秋嶺

輕陰漠漠雨班班
嶺上風來一解顏
已是去天才尺五
却令緩步有躋攀
飛泉百道縈羅帶
列岫千峰擁翠鬟
應是北堂春正滿
幾回回首望家山

用韻賦歲暮田家歎聞之者足以戒也

催科里正莫頻頻
望麥登場更浹旬
紉袴向來無餓死
黃冠此去罷迎神
田間作苦誰憐汝
天上調元合有人
自歎農家消底物
百金斗米便回春

枕上偶得數語呈林子長

碧梧翠竹日相高
懷想家山魂夢勞
鐘鼎故知非我事
箕裘猶可冀兒曹
眼中誰是真犀角
池上君今有鳳毛

原註令
嗣登科

直探牛心屠豕耳
能安貧賤乃英豪

再用韻呈林子長

癡兒誰識坐談高
撫字年來亦漫勞
簿領何妨聊爾耳
湖山正是屬吾曹
百年心事空三歎
五馬人生却二毛
欲作報章還自笑
郊寒寧解敵韓豪

據案偶得數語錄呈簿尉

昔年官冷欲無羶製錦如今又不然老去幾遭官長罵
書來却有故人憐敢期翠羽還池上漸喜黃衣減目前
欲學催科無奈拙直須天假一豐年

呈吳守

風流正始孰追回沈謝曹劉豈乏才詩律恢長憐我老
吟編端的賴君開秋懷拍拍須千首世事悠悠付一杯
已足醉吟輸白傅雪霜頭上更相催

贈潘接伴

淮海相逢便說詩
新來匡鼎解人頤
句中有眼人誰識
絃上無聲我獨知
每見朋遊談警策
偶因王事得追隨
西湖近報梅花約
歸趁東風第一枝

再用難字韻簡潘接伴

當年名下無虛士
此日詩中有二難
方駕飯山何太瘦
拍肩東野不言寒
來章只好先呈佛
屬和何當勝得官
珍重牛腰成巨軸
丁寧莫與俗人看

和潘接伴韻

久矣聞名忻識面
哦詩一字果何難
筆端風月窺天巧
句裏冰霜飽歲寒
自昔登壇須老將
祇今握節愧麤官
相逢忽有新篇贈
病眼摩挲得細看

和探菊南坡

春來自分菊成坡
秋晚何妨日一過
喜色忽看眉上見
霜華應向掌中多
一枝須索蟻浮甕
三徑從教雀可羅
坡下有泉唯可飲
西風吹鬢未應皤

出郊迂倅車暮歸二首

簿書叢裏得抽身，豈是將迎不厭頻。
何處鷄豚燕同社，有時鷗鷺喜相親。
山頭落日催歸騎，陌上豐年見醉人。
更羨柴門無限好，今宵相對月華新。

軋軋籃輿迫暮歸，前村燈火漸依稀。
溪邊默數黃牛過，煙際遙看白鳥飛。
把酒無人風落帽，原註是日重九荷鋤有客

露沾衣。關門山寺知何許，忽聽鐘聲度翠微。

和陶學長雪詩

寒侵病骨笑支離
爐撥通紅小放圍
風運六花侵几席
雲移萬杵碎瓊璣
從渠窮巷面車徹
休羨朱門點舞衣
造物想憐為學苦
分光先許到書帷

賦雪

風緊靈犀怯鎮帷
曉來白盡遠山眉
石蹲錯認鹽形虎
地煖應知穴處狸
色混江梅無眼目
潤添隴麥有膏脂
朱門酒肉嗟遺臭
藍縷樵夫不掩肌

再和

風回雪急巧穿帷黃竹歌殘更斂眉燕集幾家尋鵲鷺
獵園何處問狐狸長飢政自愁黃獨高卧誰能管竊脂
賴有寒梅為老伴也應凍減一分肌

立春日雪

占候農祥恰正晨一天遽有散花人飄揚柳絮猶疑早
點綴梅花欲亂真但愛千峰如立鵠誰憐百結有懸鶉
玄冥珍重豐年意分付東皇作好春

和漢老弟雪詩

大皞行春未有聞
六花連夜舞繽紛
落梅未曉驚三弄
宿麥先秋定十分
飛上綵幡憐我老
映來書幌慰兒勤
四時代謝從來事
造物何心更策勲

漢老弟寄示雪詩倡和已成軸矣因次韻

臘盡冰花墮渺茫
詩來爽氣想清揚
潤添隴麥知年熟
影浸溪梅見月將
閉戶誰能呼白墮
迴風却笑舞紅粧
小橋夢入南坡路
並轡騎驢賦短章

衡門雖設晝常關
人在瓊樓玉宇間
一笑眼青餘老櫓

相看頭白祗高山攜壺索共梅花醉著屐扶行竹杖斑
此興此時吾不忘倦飛深羨鳥知還

飛灑羞明不肯朝徘徊待伴未全消將花著袂元無跡
認柳吹綿別有條璧月半規開水面玉龍千丈轉山腰
玄冥已自呈三白青帝何須又一飄

一冬無雪立春後九日始有之次湯倅韻

冰花何事太遲開肯傍春風脚底來飛絮漫天輕認柳
落英滿地錯憐梅玄冥莫恨空歸去青帝從教倒載迴

官冷無羶須一醉可能來共即時杯

和子長縣尉林同年立春後十日風雪大作訪客不值

一東烏薪抵百金外間風雪政愁陰履穿東郭先生病
梅老西湖處士吟青帝未教春滿目玄冥還有歲寒心
蹇驢不踏長安道恐落泥塗跡愈深

和湯倅春雪

雪瑞元來竟不空豐年消息喜潛通故憐梅老扶衰白

未放桃夭嫁小紅夜動簷花猶帶雨晴看隴麥待搖風
強顏追逐新年事倍費天人剪水工

十二月二十六日早起雪已三寸許夜來初不
覺也

曉來眼界忽然新一色瓊瑤與爛銀人事乖時空請禱
天心迴後只逡巡不教三白孤殘臘要與千家作好春
宿麥連雲雖入望路傍猶有翳桑人

和耘老弟慶太安人恩封

天上恩榮逮我親日邊消息趁麤賓

原註 語封以 五月一日下 先生

花誥宜多壽喜動萊衣別有春須信慶源能衆衆故教
樂事愈頻頻明年不但郊封止八秩重看寵渥新

和耘老弟喜雪

天憐好景付君收一笑春生紫綺裘賦就兔園爭授簡
酒酣鯨海快吞舟怪來柳絮穿簾額舞上花裯襯襪鈎
畫餅豐年賒一醉臘前三白詎應休

和漢老弟雪下不聚

剪水飛花散又收
天人袖手翠雲裘
待滋宿麥須連隴
政慮流民醉覆舟
村店浪誇沽酒旆
寒窗誰上釣詩鉤
玄冥豈是癡兒子
且與天工了事休

雪晴後書懷

爛銀白壁遣誰收
米盡家家典破裘
應為溪橋添曉溜
豈憐野渡有橫舟
侵凌蓬鬢霜千丈
浮動梅梢月一鉤
歲晚風光天必相
未甘亭上話三休

明堂杞梓必兼收
未信英雄老一裘
彭澤不妨聊束帶

巴東何事嘆孤舟
會須取印大如斗
寧羨封侯曲似鉤
咄咄那庸如許事
尊前且食蛤蜊休

因次郊行韻眷然懷歸

杖藜何日返林垌
夢想西山幾草亭
叢菊暫為三徑別
垂楊又見兩番青
宦遊知己雲中月
市道交情水上萍
多事不煩漁父問
餽糴久矣忘偏醒

連日大雪獨坐有感

低唱誰家帳縷金
何如短棹泛山陰
天邊鴈斷無留影

泓下龍寒亦懶吟着柳便隨風作態欺梅除有月知心
晴光却喜前村動春事從今日日深

呼得蒼頭數索金旋沽村酒過牆陰焦琴不鼓知音斷
凍筆頻呵作意吟擾擾漫天空眩目看看出日為寒心
憑君試向江邊問又漲晴波幾尺深

吳使君置酒見邀坐間雪作有詩即席和韻

漁蓑江上晚垂釣艇子何如喚莫愁相伴梅花開庾嶺
寧將斗酒博梁州夜歸深巷聞驚犬歲稔無人見佩牛

明日樓前增偉觀試看銀海戲羣鷗

被旨暫攝四明已具舟而雪作王誠之有詩相

餞次韻

剡溪風雪正紛紛暗想清遊已目存
頗怪扁舟遽乘興應緣坐席不容溫
海圻聊爾誇千騎帳底何如一尊
回首兔園吟賞地從今授簡致頻煩

和漢老弟喜雪

為瑞雖多却不宜誰憐孤坐撥灰時
興添竹葉蛆浮甕

瘦損梅花雀抱枝
閉戶從教行跡斷
裏裘猶怯暮寒欺
天工似欲還三白
冷淡家風合有詩

劇暑出局徑歸打睡
踰月不奉正甫談緒
且頓寒詩盟有詩見
問輒次韻謝不敏

早歸伏日莫躊躇
晝寢從教笑宰予
奠枕清風招我老
攬衣閱月向人疎
寧無酒共公榮飲
亦有詩成阿買書
須待雨涼尋舊約
只今旱火況焚如

太學秋試封彌夜深
獨坐懷考試諸友

衡鑒高懸已自公修嚴官禁不遁風樊牆便有河山隔
夢寐猶疑笑語同離索暫應踈酒醴往來爭敢遞詩筒
燈花預報楊園約端的釵頭綴玉蟲

西歸有期喜而復作

懶于塵土踏京華張翰西風久憶家江上魚肥應可鱸
田家酒熟未容賒狂踪泛泛渾猶梗病眼昏昏祇欲花
為報王孫早歸矣莫憑芳草浪咨嗟

十二月初六日抵儀真廨舍次日即出護使客

天氣嚴寒裏河水合有厚一二尺者打凍峻急
不免取山路徑走都梁

王式當年本不來那堪歲晚犯塵埃淮分南北誰為梗
路適東西意自哀錦纜千艘分玉帛永河萬處碎瓊瑰
只消一夜東風力一船頭盡撥開

和耘老弟得銅龜韻

神龜又復化頑銅塊處潭心智莫窮豈悔剗腸遊夢裏
還羞曳尾向塗中波搖金色連山赤星動瑤光徹夜紅

網送吾家占瑞應向來左顧與今同

冬至之二日兄弟兒姪偕過西山道院歸而微

雪

忽然薄暮暗江天衝面涼風馬不前五色書雲占昨日
六花瑞雪應明年向來水旱民何罪此去流移天盍憐
逗曉陽烏升若木摧頽病鶴亦踟躕

雪後過南坡

南坡千樹總瓊瑤走馬來看及未消短鬢風前愁素領

哀顏酒後借紅潮松饒蒼鬚猶能奮梅耿香魔苦費招
此景此時無我共新詩吟罷獨長謠

扶桑暖翅接金烏韞上飢鷹待一呼懸滴梅梢珠璀璨
墮花檜頂粉糝糊明年翠浪麥須好何處青帘酒可酤
萬里江山誰畫得天開新樣雪晴圖

回程泗州道中

淮北燕南昔混同相望却恨馬牛風往來未省誰為伴
原註接送
皆女真人
言語從來自不通百歲遺民愁緒外數聲羌

笛夢魂中

原註接送伴先乘馬以笛自隨

徑須急渡長淮去三月烟塵

一洗空

挽新安恭榮王詩

安僖折派慶源長憲靖猗蘭奕葉芳可但詞章誇華白
更餘政事說龔黃兩宮密侍清閒燕三事榮分袞繡光
生死哀榮難得似宸綸一品贈真王

弁峯苔水挽將歸北第南園自一時過眼浮名真是夢
回頭樂事總成悲荆蘭膝下同黃壤鴻鴈行中失白眉

曾是汝陽門下客
淒涼空咏八哀詩

挽崇憲靖王詩

襲慶安僖八十春
綿綿僊李更蟠根
王封一品身尤貴
位冠三師德愈尊
華筇樓邊空墮淚
白蘋洲上重銷魂
哀榮終始公何憾
節鉞貂蟬萃一門

詔書催喚袞衣歸
富貴誰知已息機
北闕恩榮寧久戀
東山雅志肯相違
傷心水月人安在
回首湖山事亦非
他日蘇公堤畔路
祇愁老淚不勝揮

余居太夫人憂三年淚枯老眼既除喪頗理故
書似覺有味矣數日眼疾作此事又廢殊無聊
賴唯有思索詩句可以度日耳

三年涕淚劇懸河斷簡殘編奈若何縱使相看青眼在
故應添得黑花多哀遲把酒元無分冷淡觀書亦有魔
掩卷相吁心自了莫將文字問維摩

前詩謂思索詩句可以度日第恐終無益再賦
一首以廣之

年來世味一毫輕宿契詩書尚有情
魔事從教雙眼赤
內觀還覺寸心明
思量詩句嗟無補
檢校醫方恐未精
俗學可憐誇口耳
何如默坐息營營

挽吏部石似之

四海聲名桂一枝
流年份及手中著
康成未免龍蛇厄

翁子寧酬富貴期

原註公享年止四十九

天上玉樓須好記人間

金谷漫遺詩
宦途落實知音絕
三撫朱絃只自悲

憂國囊封豈是疎
有才無命信何如
風迴冊府三山遠

星殞郎墻一位虛賈誼自傷終太傅薛收若在必中書
哀哉埋玉今何地却返當年處士廬

期公簪橐侍甘泉底是上天不假年才大難為當世用
文高猶有後人傳魂銷閩檄千山路淚挽銀河七月天
會葬誰歟銘郭泰固應無愧翠珉鐫

和紹興錢參政貢院落成

能為君王獵雋英區區循吏笑西京忽看廣廈千間闢
蚤覺先春萬木榮有客囊中來露穎

原註預薦者十九人

何人壘

卷二
上去傭耕知公造化無遺物咫尺龍門雷電生

挽水東吳主簿詩

當年投筆過淮山油幕談兵故不凡老去功名空白髮
向來簿領愧青衫龍龕內典超金界鴻寶遺編付玉函
況有諸孫振門戶不須留恨黯松杉

挽主簿楊仲遠詩

居士冒懷壑與丘琴山懷抱枕清流一區宅好真揚子
萬卷書多似鄴侯好客亦嘗陪俎豆諸郎殊不廢簞裘

人間俯仰成千古痛念吾鄉馬少游

挽僊尉黃公詩

平生懷抱欲凌雲元祐名家蓋有君況是生兒勝武子
何須不第歎劉蕡傷哉未作河西尉已矣還空冀北羣
從此太湖風月夜一聲漁笛不堪聞

除日失步詩以自解

雙脚平生不踏空誰教仰面看飛鴻娛親正要同萊子
爛醉何曾過阿戎已分折腰營五斗恐因折臂作三公

妻孥不用閒惆悵得失從來塞上翁

丁未禮部貢院監門次張伯子判院韻兼簡正

甫判院三詩

金門誤喜綴朝班猶自塵勞債未還
曉漏驚催門外鵠春蠶空想管中斑
羣公神遇無全目老我旁觀只汗顏
安得僊人修月斧與君攜手到中間

禹鑿門高競化龍桃花浪暖百川通
圖南俱運雲鵬翼逐北誰收汗馬功
鎖鑰僅能防宿弊權衡正好變文風

抱關碌碌真吾事竊喜清朝取士公

槐市同登弟子員
蘸鹽燈火記初年
尋春紫陌風流在
通籍金闈步武聯
眼底要觀新事業
筆端猶著舊山川
夜窻細話行藏處
始信于君有厚緣

林正甫察院出示送劉德修都運殿院詩并德
修和章人事好乖置之勿復道也第見傾益
如平昔而萬里遠別又不能一面得非皆有不
偶然者存乎勉強繼韻一寫胸中磊塊而結戀

之懷又有詩所不能盡者

吾道艱難孰使然憂來真欲問諸天方看驄馬避桓典
遽為蝦蟆賦玉川去國身輕寧絜絜愛君意在故卷卷
瞿塘滌瀨風波惡百丈孤騫上瀨船

彈劾生風筆有神天教末路得相親從來名下無虛士
今見朝端第一人銷印不知誰發難投珠那得謂無因
何妨弭節潼江上我亦歸歟伴隱淪

思歸

風雨連朝作伴牢，只堪痛飲讀離騷。
誰知老境侵腰腳，早是多情惜鬢毛。
杖屨出門還有碍，簿書堆案敢辭勞。
年來俯仰終無補，尚欠歸田一著高。

中書邵舍人挽詩

璧池鼓篋歲庚辰，蟾窟分枝癸未春。
夾侍螭坳司記注，同升鳳掖演絲綸。
靖言交契從來厚，追想音塵不復親。
拘綴無由陪執拂，招魂楚些為沾襟。

春大閱呈郡僚

青油談笑坐生風便覺湖山氣象雄
霽色喜浮旌旆上歡聲爭入鼓鼙中
中軍合用詩書帥上馬空慙矍鑠翁
橫槩賦詩君等事何妨寓目此時同

秋大閱呈郡僚

橫槩何人解賦詩東方千騎出郊時
天高霽色旌旗上日原註是雨霽地迥秋聲鼓角悲
漫授一編黃石老相從千載

赤松期

原註出赤松門

據鞍矍鑠非吾事慙愧江湖把一麾

和使君輩大監秋閱

金鉦鼙鼓肅秋聲
畫戟油幢照座明
千騎夾營橫槊氣
六花簇隊煥新晴
雍容壇上看儒將
潦倒尊前愧老兵
橫槊賦詩豪傑事
澄江休數謝宣城

和吳守賦秋閱之什

秋郊小隊暫徘徊
誰信儒門出將才
千騎控弦吳月滿
一聲鳴角楚天開
賦詩已是誇橫槊
看劍何妨更引杯
收取中原報明主
凌煙事業正相催

送鄧舍人將漕西淮用舍人坐上詩韻

西湖煙柳勝陽關遮斷淮南大小山詩好固應傾座上
酒行猶喜到花間君王納諫寧容去風雨愁予豈坐慳
未用疾驅催上道鋒車有詔徑須還

醉裏誰分主與賓離觴到手莫辭頻感懷今日知何日
屈指三春破二春北郭忍教風送客江湖猶賴雨留人
晚晴依舊山光好穩穩移舟傍玉津

送別王誠之給事

娟娟酸風吹客衣冥冥芳樹攪愁思誰教官路分南北

自是人生足別離送岸飛花何太急
畱人夜雨故來遲
眼前他日鳬鴻墮莫作情疎不寄詩

挽俞君任通判詩

鄉評月旦尚依然
旁郡人稱別駕賢
邂逅宦途同晚歲
游從太學記當年
誰憐冷落堪為地
我欲吹噓送上天
薦墨未乾君已矣
漫憑楚挽慰重泉

日來歡意頓減
幸秋雨既足
中秋定晴
預約南
坡小集觀月
且屬耘老弟董其事

酒熟床頭已聖清吟詩窓下莫悲鳴故人明月從來共
今歲中秋定好晴雨脚已隨荷蓋風頭還逐桂花生
試謀一笑君須會誰道尊前笑不成

十一月一日早起

悵望淮山落木風楚天雲霧更重重粵從西路來東路
倏見三冬過一冬韶散人誰憐季子樓高吾豈下元龍
求田問舍今良策自覺歸歟興頗濃

離都下

經年不踏軟紅塵偶入修門事事新
本為湖山尋舊約却愁風雨送行人
多情黃菊空搔首無伴芳醪可入唇
今歲重陽殊草草南坡歸夢夜來頻

十七夜待月

青天遙望片雲無坐待冰輪出海隅
沆瀣已垂梧葉重蟬娟猶惜桂華孤
夜闌紅燭休更秉春滿香醪不用沽
且放虛簷歌緩轉恐驚三匝未棲烏

是夜三鼓後睡起月色滿庭

幽人睡起已三更始信今宵不浪晴
天宇元來如許淨
月華別是一般明
風前鴈斷應無信
露下蛩吟豈不平
無賴姮娥肯留照
疾驅蟾魄度前榮

九月八日遊報本寺

詩翁懷抱十分秋
探借重陽作勝遊
蓮社政須陶靖節
竹林未羨阮陳留
逢僧應說無生話
顧我何如不繫舟
明日黃花須斗酒
莫將容易換涼州

連日禱雨猶未應也
數語漫述皇恐之意呈簿

尉

誰令旱魃逞神姦
悵望西疇一雨慳
日永六龍方緩轡
天高九虎政當闕
不論賦入今難辨
見說流移昔未還
地上小臣真蟣蝨
禱祈無效祇慚顏

小兒曼倩儘狂姦
試掉雷車與破慳
慰我農民須早計
憐渠歲事頗相關
齋盂并日渾忘味
詩債如山只欠還
謝令冥頑推不去
毫絲無補亦胡顏

政在簿書叢中王簿示二詩推案漫述數語

文書堆案汗如洗，鴈鴛滿庭聲甚喧。
縱有可人來眼底，了無佳思到吟邊。
翠眉對我何曾展，白眼逢渠不受憐。
上策從來三十六，就中除有一歸田。

新糊小室明簾戲書

先生丈室淨無塵，白紙糊簾莫笑貧。
夜靜風嚴寒不動，朝來雪積欲爭新。
圍爐只用深藏火，隱几還應煖似春。
紙帳一床餘紙被，不妨更作獨眠人。

宿巢縣地藏寺枕上偶成

年來蹤跡漫奔波其奈功名有命何
畫虎向人無好手
飯牛憐我有悲歌
丹心永夜燈前苦
白髮明朝鏡裏多
却謝前村鷄唱好
呼兒起舞肯蹉跎

家書送白額因賦

虎踞南山孰敢樵
盜渠名字却深逃
誰能雪裏窮三窟
縛送尊前慰老饕
試喚玉纖揜碧袖
笑看霜片落金刀
族庖堪恨無風味
紅暈蒸花更藉糟

丙辰二月上丁釋奠致齋于經史閣呈郡僚

泮水分明記舊遊上丁祠事得重修音遺金石疑猶在
菜有蘋繁信可羞老我今慚郡文學諸生試覓汜鄉侯
緬懷安定規模遠傑閣城西最上頭

和鞏使君釋奠韻

疇昔東家一畝宮推尊昭代比天崇絃歌未輟文斯在
俎豆親陪獻有終

原註某忝與終獻

采藻載歌思泮水浴沂行

詠舞雩風

原註湖學故事上巳日拜安定墓

自慚謬玷詩書走未羨諸

儒舍蓋公

宿臨安童縣尉庵童尉送酒

原註重陽日

深深松竹隱禪房更渡溪橋暫解裝但喜還家無數日
不知行路過重陽白衣送酒勞相問黃菊依人未肯芳
珍重山僧能會意殷勤掃榻為燒香

次林正甫韻

湖山夢想阻登臨柳色門前綠未深老去青衫誰著眼
向來白戰尚寒心澆愁可欠杯中物遣興聊為洛下吟
倒指啟關春已暮直須修楔繼山陰

護客高郵道中舟中讀簡齋十月詩因和其韻
莫莫休休興已闌滿頭塵土更彈冠鴈從北到傳書易
淮界中流遣恨難篷底吟哦詩有味胸中磊砢酒無歡
故人莫枉綈袍意范叔猶能忍一寒

王貫之有詩留別因次其韻

檣頭語燕底匆匆滿幅蒲帆送客風命與仇謀從此逝
病兼貧至向來同紛紛時事愁眉上咄咄人情醉眼中
頗覺田園歸去好固應馬首未渠東

林子長見訪泊舟姑蘓臺下有詩因次其韻

懷人玉樹向風前明月中秋動隔年

原註予三年間轉徙湖發吳門三郡

凡兩度中秋與子長相會

勝處盃中忘爾汝幾回紙上落雲煙已能

命駕來吳苑未許回舟指雪川顧我從來無此客漁蓑
那得戀江邊

朱天永示僕二詩蓋有激而云者因用其韻以
廣之

是非得喪一毫輕蠻觸何勞角上爭未可輕量天下士

渠知不是穀中英平生我亦輕餘子到處君安得此名
勿對秋花歎憔悴春風回首又欣榮

彈鋏悲歌莫浪嗟筆耕心織是生涯區區子豈癡慕虎
事事吾猶錯畫蛇不分縮頭幾類鼈苦嫌怒目幾遭蛙
憑君試讀山君傳鶴豈能言為嫉邪

漢老弟近書云欲看文字無暇作詩再用韻

脫粟羹藜未厭餐何心華屋薦金盤風前覓句中常岸
月下揮觴影亦單懶拙不堪當世用行藏留與後人看

也知妍醜初無定馬面相憐亦奚藥

原註語
語有云

太守送酒詩

拜捧雙壺急破封蓬廬驚怪闌兒童歡生和氣薰蒸外
春在先生醞釀中枯涸詩腸偏借潤飄零酒醖不憂空
更看小隊尋花柳太守風流似醉翁

黃堂還復念酸寒餘漑分來玉笋寬遽遣茅柴羞避席
快呼苜蓿彊登盤步兵勝處輕劉子北海狂言近阿瞞
何似老虔春夜酌簷花細雨洗愁端

以郡醞十斗送林子長

我友溪堂愛說詩
兵厨況有酒如池
留髭一石從來慣
訪戴扁舟莫太遲
已辦鴟夷陪後乘
姑令從事作先馳
憑君試向松江望
綠漲蒲萄正渺瀰

郁簿行年四十有九
讀李太白潯陽感秋詩慨
懷有作次韻勉之

清德如公畏四知
流光底事感圓蓍
日邊丹鳳聊棲棘
月下驚鴻尚揀枝

原註君不安求當路薦

五十知非慚漏盡
百年

彊半怪駒馳買臣富貴猶堪待莫誦潯陽落魄詩

用山門記遊韻賦醑醑簡林子長不蒙寵和豈
不復作書生調度耶因以詩督之

嬾娜柔條不自持鎖窗深處最相宜試教纖手簪雙鬢
莫遣新愁上兩眉子建洛神空有賦樂天楊柳可無詩
為君喚起溫茶夢春草池塘日正遲

戲簡林子長

溪上園亭處處新想君屢費橐中銀鶯窺繡戶煩三請

蝶遶花梢知幾巡恨不即時謀載酒恐因暇日得尋春

只愁又隔同年面却欠尊前似主人

原註聞子長餞萬
元亨飲梅花下命

侍兒歌以侑酒萬亦
賦詞僕則未之見也

再和

崇桃積李巧爭新紅勝臙脂白勝銀車騎每勞鶯喚
藥欄聊伴蝶遊巡何須歌舞留連夜漫與詩篇慰藉春
珍重海棠煩問訊肯教空谷老佳人

簡蕭東夫

向來一瓣為南豐縱使能詩也坐窮千里望中同夜月
五言城裏帶春風人言止酒今直止君自中書豈不中
莫道天工全憤憤滿頭白髮亦何公

遊虎丘再用韻

虎丘欲到幾年華靈運何妨不在家風艇也遭新壩阨
芒鞋可憚去途賒禪心默會點頭石幻化應羞解語花
憶昔吳王舊池館一堪行樂一堪嗟

揚州司理章公挽詩

宦遊曾記舊桐川
泮水淒涼愧鄭虔
怪得儒流有師法
知從鄉老得心傳
未酬龍伯連鰲手
遽作維揚跨鶴仙
太息孔門空用賦
不教一柱果擎天

原註公昔鄉薦賦
有一柱擎天之句

云故

章樞密挽詩

當年抗疏動宸旒
騎省烏臺許遍遊
穩穩樞庭方緩步
駸駸揆路却回頭
空餘榮錦開三徑
猶有甘棠蔽兩州
浮世功名俱一夢
不須夜壑怪移舟

引年歸老十星霜養素遺榮道愈光可但蒼生思謝傳
未應白首愧馮唐龍光方慶千齡遇鳳詒俄嗟一鑑亡
前輩風流磨滅盡後生無復見堂堂

正卿不見累日聞十二日與鄭丈舍人游何山
書此為寄

剩欲從公朝暮閒一溪留我未容還極思談笑三秋隔
相望林泉數里間詩絕一時同鄭老書堂終日憩河山
報來定有吳門信快矣黃嘉明月灣

次張安國舍人讀王侍郎詩有懷其人韻

蓋世聲名紫府仙平生襟袖著山川一麾管領秋江月
千首憑陵杜曲天疇昔風雲餘感慨歸來文字帶芳鮮
和韓何限驚人句應有門人李漢編

書懷

丘山何必萬牛回櫟杜從來貴不才無事飲多惟日醉
有聲畫好亦天開欲謀松菊園三徑翻訝文章水一杯
未免無衣憂卒歲籬根慚愧候蟲催

宦路侵尋已倦遊功名何敢望前修
謬紆州組三宜去
回視儒冠一忍羞
疇昔嘗窺循吏傳
只今誰是富民侯
夜來好雨催歸棹
春水茫茫漲鴨頭

夜坐書懷

看鏡功名不用頻
醉鄉境界幾由旬
何妨走馬來為問
縱未成龍亦有神
生計一絲寧掛眼
閒居百事不如人
驚鴻亦有高飛意
姑傍花前過却春

夢覺誰呼小玉頻
分燈魔女笑波旬
暮年禪悅渾知味

少日文章豈有神赤脚玉川容老婢綠珠金谷漫佳人
玄冥不是梅花主開盡南枝付與春

春日書懷

吳興太守也堪憐十日齋廚九不煙索漠清懷寒食夜
顛狂風雨落花天流鶯百轉還求友化鶴重來不是僊
待得麥秋民足食君恩萬一許歸田

用韻約宋宰諸公為尋梅之行

澹煙寒雨洗輕埃千樹江頭探借開莫倚風流貪畫柳

直須火急去尋梅可能卯酒三盃罷索取冰姿一笑回
好手河陽教落後紛紛桃李滿輿臺

玉溪梅株柯殊絕宜和閤用事者嘗圖以進
竟不報今迺棄置蔬畦摧折憔悴有可憐之
態昨陪諸公往觀共歎其不過且約盛開時
攜壺酒為醉賞之適因循又不果因用韻弔
之

玉溪得得探芳期孤負詩人盡醉歸消息向來空驛使

畫圖老去惜明妃香魂月墮驚春夢翠袖天寒怯暮暉
蜂蝶卑凡渾省識良迷桃李起狂飛

